

مينا خادم شاطر في الكنيسة كل الناس بتحبه و بيحب يخدم كل اللي يقدر يساعده بس فيه مشكله محدش واخذ باله منها غير مينا بس و هي انه بيعمل كده علشان يتشاف، هو مستني مقابل من اللي بيخدمهم هو مش بيخدمهم علشان بيحبهم هو بيخدمهم علشان هما يقولوا عليه الكلام اللي نفسه يسمعه .

حب الظهور او حب المديح من اكثر الإدمانات الخفية المنتشرة الفترة ديه خصوصاً إن بيوتنا بطلت تتعامل بالكلمة الحلوة و بطلت تشاور على الحلو اللي فينا , مابقوش يعرفوا غير النقد كأسلوب للتقييم و التهذيب و ده نشأ جيل مخفيه مميزات عن عيونه فبدأ يدور عليها في عيون الناس حتى لو هيشحتها .

المثال اللي قولته فوق بسيط لكنه متكرر مع كل شخص بتقابله كبير كان أو صغير , هقولك ازاي دلوقتي , ماشوفتش قبل كده مشاكل حلها بيكون كلمه حلوه تشاور بيها على اللي قدامك تخليه يهدأ و يتأكد انك شايفه كويس و انك عارف ان وسط الغلط فيه شيء إيجابي , ماشوفتش قبل كده مشاكل زوجيه بتتحل لها حد من الطرفين يقول بس كلمه حلوه يهدى بيها الطرف التاني ! , طبعاً انت مستنيني اقولك ان صاحب المثال اللي فوق هو شخص سيء و انتهازي و استهلاكي للي حواليه لكن للأسف الشخص اللي فوق انسان يتغذى على الاكل و الكلمة الحلوة اللي بتعدل نفسيته , هو ماكنش غلطان هو بس محتاج يتشاف و يتحب , محتاج يتقبل و يثبت لنفسه قبل غيره انه فيه حاجات كويسه رغم السوء الموجود و على فكره ده طبع أي مخلوق بشري .

دورك انك ماتبطلش تقول الكلمة الحلوة للي حواليك و قدم ليهم محبتك بكلام بسيط زي " تسلم ايدك" " الاكل تحفه " " لسه عندك أحسن " " لبسك حلو جدا " " اشطر كتكوت " " انا فخور بيك " , النوعية ديه من الكلام بتقوم الانسان على رجلين صلبه و تنور عيونه على مميزات لها تكون طالعه من القلب فعلاً و محمله بمحبه فائقة للإدراك العقلي اللي تخلى الشخص يحبك من قلبه بجد .

" عمري مش ثلاثين , ولا أربعين ولا حتى خمسين

عمري بيكبر ويصغر مع كل كلمة حنين

أو كلمة قسوة تخلي قلبي حزين" ..

-صلاح جاهين-